

雲南通志



雲南通志



雲南通志卷之第七

學校

附書院
書籍

義學

滇南建學肇自漢時張盛受業長卿尹許執經中土
滇之文風由此漸啟然地居天末百蠻雜處椎魯寡
文卽向者志學之士家鮮藏書欲其博綜今古窮源
探本勢有未能我

朝

列聖相承敦尚正學尊崇

先師追王五代俎豆馨香教澤洋溢西南學者益勃然奮
興思誦法聖賢講肄經術而節制重臣廣宣德意復

置四庫書於華山書院俾得肆力討求今

皇上又加意膠庠優恤師儒增其品秩以隆表率且

諭學者濯磨文體必衷理道自茲以往士將明體達用蔚
爲國華金碧蒼洱之區不且彬彬然追蹤鄒魯矣乎
志學校書院義學書籍附焉

後漢章帝元和中蜀郡王追爲益州太守政化尤異有神
馬四匹出滇池河中甘露降白鳥見始興起學校

唐元宗開元三年盛邏皮立孔子廟於國中

元世祖至元十九年命雲南諸路皆建學以祀先聖 二
十九年四月設雲南諸學校以蜀士充教官先是至

元六年中書省定學制頒行之命諸路府官子弟
學上路二人下路二人府一人州一人餘民間子弟
上路三十人下路二十五人願充生徒者與免一身
雜役以譯寫通鑑節要頒行各路俾肄習之

成宗大德五年定生員散府二十人上中州十五人下
州十人 元貞元年命有司割地給諸路蒙古學生
員廩餼

明洪武十八年令雲南所屬生員有成材者從便選貢
永樂十年雲南左叅政呂明善請設武定尋甸廣西三
府學從之上曰學校風化所係人性之善蠻夷與中

國無異特在上之人作興之耳六月癸亥賜國子監
琉球國雲南四川官民生懷得等一百三十六人夏
布藍衫靴絛

正統二年增雲南儒學師生廩米 十年令提學官敎
官考選生員年四十以上不諳文理者廩膳十年以
上送吏部六年以上送附近布政司增廣十年以上
送本布政司直隸送本府俱充吏六年以上竝鄙猥
殘疾者悉黜爲民雲南貴州免考 十四年令揀選
軍戶送學習武舉業

景泰二年令雲南貴州軍民生兼考補廩膳照例科貢

天順六年命廷臣舉有學行者提督學校以邵玉任雲南學政

成化十七年設廣西府學

隆慶二年設武定府學

萬歷四年定廣西四川雲南等處凡改土爲流州縣及土官地方建學校者令提學嚴查果係土著之人方准考充附學不許各處士民冒籍濫入

本朝順治十八年准雲南省土司應襲子弟令各該學教訓俟父兄謝事之日回籍襲職其餘子弟併令地方官擇文理稍通者送提學考取入學先是順治四年

直隸各省分大中小學大學取生員四十名中學三十名小學十二名又定直省各學廩生府學四十名州學三十名縣學二十名衛學十名增廣生額數同九年定每鄉置社學擇文義通曉行誼謹厚者充補社師免其差役量給廩餼優贍提學按臨查考又題准刊立臥碑置明倫堂之左永爲遵守至十五年定童生額數取進大府二十名大州縣十五名小學四五名

康熙六年設開化府學並教職 九年定各州縣童生

中學十二名小學七八名 二十二年定雲南土司

子弟竝土人應試附於雲南等府三年一次共考取
二十五名 二十五年以社學冒濫令提學嚴行查
革 五月頒

御書萬世師表匾額於學宮 三十一年設師宗雲州新
平定邊元謀五州縣教職增馬龍州寧州呈貢縣入
學額照中學例取進十二名 三十四年頒

御製

先師孔子及顏曾思孟贊於學宮立石 四十一年頒
御製訓飭士子文於學宮立石 五十三年

詔天下學宮升朱子本主於十哲之次 五十五年進宋

名臣范仲淹於先儒之次

雍正元年崇封

至聖先師五代王爵各直省府州縣建

崇聖祠

二年六月增雲南各州縣歲科試取進文童額

數昆明宜良南寧通海河西河陽太和浪穹保山楚

雄十縣安寧晉寧尋甸建水石屏新興趙州鄧川劍

川騰越十州各五名呈貢蒙自雲南三縣陸涼霑益

寧州阿迷賓川五州各三名和曲州四名黑白琅三

井准其設學俱照小學例各取進八名分定遠縣訓

導駐黑井大姚縣訓導駐白井姚州訓導駐琅井

增祀明儒羅欽順 本朝儒臣陸隴其於東廡先儒
之次 三年十一月

詔天下地名姓名有同

至聖先師諱者卽改爲邱字讀作期音 十二月頒

御書生民未有匾額於學宮 設威遠同知取進童生額

數二名未設敎職附元江府學考課 五年設東川

昭通府鎮雄州永善縣敎職取進童生額數東川昭

通各十名鎮雄永善各八名 七年設普洱府學分

元江府訓導駐其地取進童生八名

雲南府

廟學在五華山右元至元間總管張立道建兼置學舍平章瞻思丁繼拓之後廢明洪武初西平侯沐英因舊址建廟學景泰間巡撫鄭顥建成德達材二坊天順五年都督沐瓚以次興修弘治十五年巡按何琛建講堂聚奎樓增置號舍嘉靖十年建啓聖祠敬一箴亭及視聽言動心五箴碑萬歷元年巡撫鄒應龍鑿泮池十八年知府易以弭重修殿廡四十年巡按鄧渼提學黃琮以縣學廟附於府四十三年巡撫周嘉謨提學張閭遷建明倫堂崇正元年知府王紹旦建文昌魁星二閣丁亥燬於兵遷建於長春觀

本朝康熙二十九年總督范承勳以規制未協同巡撫王繼文請仍改建今地合府縣廟學爲一始置祭器樂器悉依闕里規制三十四年巡撫石文晟建

御製

至聖先師及四配贊碑亭五十八年教授侯以璋建魁星樓易舊魁樓爲桂香樓祀文昌雍正四年總督鄂爾泰增備祭器十二年總督尹繼善巡撫張允隨督學吳應枚布政使陳弘謀重修并易琉璃瓦添備祭器樂器

昆明縣

廟學

舊在府學西北弘治十六年巡撫林元甫巡按陳天祥建嘉靖十七年巡撫汪文盛以地卑濕遷於府學

東南萬歷四十年合於府 本朝康熙二十三年總督
蔡毓榮請以吳三桂偽宮殿改建廟學二十九年復附

府廟

富民縣

廟學

在縣臥雲山麓舊無學附於羅次明萬歷四十八年
知縣韓位甫請專設學校天啓二年巡按楊春茂題

建移府學訓導

一員董之崇正中設官建廟於郭外丁
亥燬於兵 本朝順治十八年知縣李展翮於縣治內

西北建廟竝啓聖祠康熙二十一年諸生楊繩祖等呈
請遷於察院之廢署燬廡門坊一新四十七年知縣謝

天璘復詳請改建今地雍正十二年
知縣楊體乾重修增置祭器樂

宜良縣

廟學

在縣治正南雉山明弘治間始設學正德四年知縣
余志剛建廟於城西教場之左萬歷八年知縣沈昌

印改建城東北天啓四年知縣楊述明遷今地 本朝
康熙六年知縣趙映斗教諭馬任大建啓聖祠及鄉賢

名宦祠旋遭兵燬二十八年知縣高士朗教諭王佐才增修大成殿兩廡啟聖祠魁星樓及左右齋房五十五年署縣黃澍移左文許重建大成殿雍正十一年知縣朱千重修

羅次縣

廟學

在縣東北隅明萬曆二十一年巡撫陳用賓始請設學遂於邑西北隅建廟年久傾圯本朝康熙六年

知縣李潁訓導陳起鯤遷於縣東羅陽書院就舊宇修葺三十二年知縣彭軹移建今地三十八年知縣梁衍祚增修置俎豆樂器四十八年知縣謝曾祚重修並移魁星閣於左雍正八年知縣任溫增建桂香閣於右

晉寧州

廟學

在州治南明洪武十六年建廟於州治北之陽城堡正統七年遷今地弘治十七年知州喻敬鑿泮池丁

亥燬於兵後署州錢象坤知州謝正及通序重建本朝康熙四十一年知州秦采改建大成殿啟聖祠五十二年署州任中宜增修鑿池樹坊規模始備雍正十二年知州鄒永馥重修

呈貢縣

廟學

在縣治東北明弘治七年建嘉靖二十二年知縣何溫遷於學基之左明末兵火僅存大成殿 本朝康熙二年知縣趙申禧仍遷舊基四十四年知縣劉世煥重建規制悉備雍正九年教諭趙公亮重修

安寧州

廟學

在州治北元大德中建隨因兵燬明永樂元年知州李智明重建宣德中土知州董福海重修後復燬 本朝康熙八年知州張在澤學正張經世同紳士修建雍正五年州紳士建魁星閣十二年署州鄒永馥重修

祿豐縣

廟學

在縣郭外西山麓舊無學附於安寧州明隆慶元年邑人王昱始捐貲建學於縣治之北萬曆間燬於兵學道黃廷寶守道汪克用遷建今地復為土酋焚燬 本朝康熙十一年知縣郭迪階訓導楊芳魁重建雍正

二年知縣魏寶國建崇聖祠五年教諭董昌建魁星樓鑿泮池十一年知縣陳齊庶重修

昆陽州

廟學

在州治南明永樂元年建於月山左弘治十五年災

州潘槐改建寶山門外十三年知州紀汝中改建拱極

門外李官村天啟六年知州陶學修遷鳳儀山左崇正

七年巡按姜思睿建造新城署州事本府通判王允中

移建州治後旋遭兵燹本朝康熙元年知州童復陞

仍治舊城遂建於今地五十一一年署州劉自唐拓址重

建五十五年署州王克剛建東廡五十六年知州何大

寵建西廡雍正四年知州臧珊建大成門名宦鄉賢祠

五年署州李文炯修魁閣八年知州劉際平建崇聖祠

易門縣

廟學

在縣治東明萬曆二十五年巡撫陳川賓題建旋以

地勢卑狹改遷城南三十三年仍移於舊址明末兵

燹傾圮殆半本朝平滇後知縣李元祿訓導吳

紹玉重修康熙三十四年知縣姜其垓拓地重建

嵩明州